



L' ORÂDJE ARIVÉVE.



Rintrés è s' mauhone, i s' sont djokés à l' fènièsse, s' aspouyî èt riwêti ène miète au truviè. I n' voléve nén awè l' êr d' ièsse aus pîces. Pa dzeu lès bwès dès nûlêyes d' anûti s' amoncêlîne. A lès voye ossi bas èt spès, on aréve dit l' fumère d' ène machine au tchèrbon qu' a deûr a satchî èt d' fé griper s' trin au wôt do tiène. S' drwète mwin s' a muchî pa l' craye do casakin, rider dsus l' pia èt fé roler doucémint inte sès dwèts l' mamuron dè l' tête. Di n'nén sawè qwè, sins ièsse aloyîs alîne-t-i polu s' mète è mwinnâdje, ça lî risatchève tot s' plêji d' l' ayèssâdje.

- Vloz vos dismoussî ?

N' èstéve-t-èle nén capâbe d' è nn' d' aler au dvant di c' qui ratindève ?

- Vloz rsatchî vos tchaussètes ?

N' savéve-t-èle nén co qu' il avéve bon d' mète, tchaur conte tchaur, sès pîds dsus lès sènes èt d' s' ènn'd'è sièrvu come d' l' aspouya clawè dsus lès crwès ?

Èle a volu fé in toû aus cabinèts. Ça lî a fait s' sovnu d' ène arâbe roncine, si fîre èt si nareûse, qu' po rén èle n' aréve pichî odobén prautlé quand i l' èstéve monté dsus sès rins. On n' mèt mauy dins l' amoûr qui c' qui l' âme vout bèn î mète di lêye min.me. C' èst bèn mèyeu quand l' sintumint n' a pus dandjî d' rén d' ôte. Mamzèle Solindje, lèye, n' èstéve nén feûme a doner à l' ome l' plêji qui n' dimnde rén d' pus. S' a-t-èle rindu conte qui Costâ s' è nn' d' aléve èt chûre tot seû s' prope voye ? Si vos lîjèz "françèse" dsus ène bwèsse d' alumètes, vos savèz djà qu' tote seûle èle n' va nén prinde feû. C' èst tot parêy avou sakants bauchèles. C'

vièsprêye-ci, dins l' lé, èle li tinéve sins min.me li rabrèssî. Tot djusse c'qu' i faléve. I l' risintéve si bén aus greûjins di s' pia, i rascoudéve sins rén è piède tot c' qu' 'i gn' avéve come odâdje dins s' cwâr sins pont d' goût èt cès flauwès djambes. Pu rén po co l' asticoter dins l' djon.ne comére. D' au lon s' figûre avéve l' êr bén nète mins asteûre di tot près, è l' astokant, i l' vèyéve ènûlé, tot mou, sins ène nukète di sintumint a z-î vîre. (Li qu' avéve todi si bon à lire li plêji si staurer dsus l' vizâdje dès feûmes qu' il ayèsséve ! Combén n' aréve-t-i volu r'voye qu' én côp, rén qu' po cès djî munutes là èvou c' qui si bèlemint i kandjîne ? Ah ! s' polu claper au mitan do front ène indjole èt prindre dès imaudjes ! Combén d' films n' aréve-t-i nén asteûre po è fé glèter d' pus d' yink èt insi fé rconèche s' vrêye valeûr ?)

Pont d' odeûr dsus l' cwâr dèl fèye, min.me è sès crolés pwèls, pa-dzos sès brès. Nén d' pus d' boune sinteu à trover qui dsus ène fouye di papî. Maugré s' paujère alin.ne, èle blèféve tot seûr. Sès tchvias flêrîne l' vîye buwêye. Nèn dès masses po li rafiylî sès narènes. Èle ni l' èssèréve todi nén inte sès brès. I n' si rindéve conte qu' èle avéve bodjî sès mwins qu' è z-orant l' tik-tak dèl monte qu' èle pwartéve à s' pognèt. Ça richènéve à ène pitite bièsse qu' aréve zûné padrî li. S' prope cwâr toûrnéve nawe ètou. S' èstéve bén l' prumî côp qu' ça li arivéve avou lèye. I li faléve co bén ça.

Tot à trake ça li a rivnu. A ètinde pus fwârt l' orâdje, il a rvèyu l' ciél, ossi bas èt nwâr qu' audjoûrdu, si stinde èt ramoncèler l' sauvlon do dèsêrt. L' iyètche do rîre dèl pitite marokine qu' il avéve conchu vèla a rimpli s' tièsse. Têrèmoto qu' on l' î loméve. Èssse qui s' èstéve po sès façons d' apicî, d' kèkî, d' grèter, d' picî, d' wachoter l' ome po li fé rèche l' mwèle do fén fond do cèrvia ? Èle richènéve à én trimblumint d' tête qui saye di mète djus tos lès stos. (On vrêy paradi l' cwâr di c' crapaude la !). A l'

sovnance, s' vîye s' a dispièrté, s' astampé come ène coloûte qui oye on flûtia èt s' mète à bate au ritme di s' song. Il a douvièt l' feûme come on douve èn rodje cabu qu'on li vout voye li keûr, èt fé s' conchance. Maugré tot, ça li a stî si wape qui n' s' ènn'a rindu conte qu' è l' ètindant beûler dzo li :

- Vos m' fioz mau !
- Èt qwè ? N' èst-ce nén là ène paurt di vosse plêji ? N' é l' savîz don nén ?
- Mins dji n' vou nén qu' vos m' fuchîz do mau, s' è nd' ala-t-èle tot chénant d' s' ènonder Il l' a riwêfî d' crèsse. A pwin.ne s' a-t-i djoké qu' èle s' a lèvé don lan. C' èstéve l' prumî côp qu' èle ran.néve di l' anûti. L' eûwe do robinèt a spité. I n' faléve nén ièsse malén po comprinde qu' èle avéve ause qu' ça fuche fini.

(à l' après do "Diâle do Bén" d' H. di Montèrlan)



Vos è fyoz-v' si on mache lès moudêyes di sicrijâdjès èt d' walon d' vèci oucobin d' avaurla ? Nén nos, na.